



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 8



Bangladesh PM Sheikh Hasina mapa nungi anener jena ogo



ICC Player of the Month atema Washington nominate siüogo

VOL. XXI ISSUE NO. 294 (ADOK 294) DIMAPUR SANGTENNÜ (TUESDAY) LUROI (AUGUST) 06, 2024 ₹ 5.00

KCCI-i shishilembartem dang tanü AYO rally nung adentsü ayongzüker

Kohima, August 5, 2024 (TYO): Kohima Chamber of Commerce and Industry (KCCI)-i Kohima nung shishilembartem dang Angami Youth Organisation (AYO)-i ayongba public rally nung shilem agitsü ayongzükerogo.

August 6 anepdang 11:00 ako nung AYO-i Old MLA Hostel junction, Phoolbari nung rally ayongzüker anunggi shishilembar ajaki dokan aser shishilembaba shibanger iba sentong nung adentsü metetdaksür ta KCCI-i ashi.

NSCN (Khango)-i KKB Rulho kibur K Rulho nem tasüba temerenshi agütsüba atema aoksar. K Rulho ya KCCI züngsem ka lir ta KCCI-i sangdong ka nung ashi.

"Tasüba temerenshi agütsüba atema shishilembartem jashir kechiyong shishilembartemi Naga yimtenren telok balala inyaksangshitsü atema senotsü

agüja arur" ta KCCI-i ashi. "Shishilembartemi tenla agütsüba atema pelatsü melena Naga political groups (NPGs)-i onok merenshir, amokmerener, teka sangshir aser tepsettsü tashi amokmerena arur. NPGs-i tax tanen makai meshiba den külemi mapang shia sen sarur aser anogoshia takhangba balala agütsür" ta KCCI-isa ashi.

"Tanü NPGs-i shishilembar, contractor & supplier, sorkar mapa inyaker aser public dang nungi tashiyim agi sen meshiba ajanga tarutsü nung tetsükdaksü ajurutsü. Iba ajanga Naga national movement aser Naga loktiba nung teraksa bentsür arutsü" ta parnokisa ashi.

Anunggi NPGs-i kija mesüra teloktem timtem ajurutsüsa lemtet tamajung magitsüla. Talisa NSCN (Khango)-i tekartiba nung Rulho anema tasüba temerenshi agüja aliba meyipa agitsü ayongzüker ta KCCI-isa metetdaksü.

SEC-i Eastern Nagaland town councils atema metetdaksür

Dimapur, August 5, 2024 (TYO): Eastern Nagaland nung Town Councils 14 kübok ward ajak tazüngla ta State Election Commission (SEC)-i metetdaksüogo.

April 29, 2024 nü election agitsü sangdong agütsüba anogo nung Mon, Aboi, Naginimora, Tizit, Tobu, Longleng, Tamlu, Noklak, Tuensang, Longkhim,

Shamator, Kiphire, Pungro aser Seyochung nung Town Councils election magi.

Nagaland Municipal Election Rules 2023 nung Rule 81 nung election agitsü shia aliba nung ajemdaker ward tazünglatem asoshi Nagaland Municipal Act 2023 nung Section 26 nung lateta aliba ama nungdakba mapatem inyaksü ta SEC-isa ashi.

Manipur atema Committee nem mapang agütsüsem

New Delhi, August 5, 2024 (Agencies): Supreme Court-i Hombarnü Justice Gita Mittal Committee nem ita trok agütsüsemogo aser parnoki Manipur nung kin o kin tsüngda rara nung humanitarian dak sendakba ken o tem maneni bushisüngdangtsü.

Iba committee ya yaküm August nung tentet aser parnok nem humanitarian t e b i l e m t s ü t e m bushisüngdangtsü mapa lemkütsü. Iba nung tetsürtem dak tashiyim inyakba, lendong

nungi jenburtem nem teyari agütsüba aser medical & psychological care dena lir.

Senior Advocate Vibha Makhija-i committee tenüng nung Supreme Court dang mapa tembangtsü atema ano mapang nungdaker ta ashiba sülen Chief Justice DY Chandrachud-i anir Justice JB Pardiwala aser Justice Manoj Misra na adenba bench-i ita trok agütsüsemogo.

Justice Gita Mittal Committee nung High Court balala nung taoba Chief Justice aser Judge den dena lir.

Meghalaya nung yimtsüng kati Sunday tourism noktanger

Guwahati, August 5, 2024 (Agencies): Alima tobur ajung wazüka ayutsü aser merükmejsü atema Meghalaya nung yimtsüng kati Deobarnü tourist tem marudaksütsü telemtetba agiogo.

East Khasi Hills kübok Khlieh A Sem village council-i plastic jana agi menenmechiba noktangtsü aser tourist tesemtem merüka ayutsü nükjidong nung

iba lemtet agiogo. Khlieh A Sem nung tzüin (waterfall) aika lir aser 2022 nungi tourist temi iba yimtsüng kanga semdang.

Ajisüaka village council-i tourism madak merükmeju aser alima tobur ajung wazüka ayutsü atema temulung tuluba agütsür. Deobarnü yimdaklir ajak sentepi aoer aser iba ajanga jana anepalur shinga malir.

Bangladesh kaketshirtemi PM Sheikh Hasina atsüngdokogo



Bangladesh prime minister Sheikh Hasina-i menden yutsüba sülen August 5, 2024 nü Kolkata nung India nung jenoka aliba Bangladeshi nungertem benjungtepba noksa nung angur.

New Delhi, August 5, 2024 (Agencies): Sheikh Hasina-i Hombarnü Bangladesh Prime Minister menden nungi sodi agi aser linük toktsür jena arur India nung jenoka lir.

Tanü Dhaka nung Bangladesh army-i nübertem azüoktsü atema mapa inyaksü tenzük aser Sheikh Hasina amenba tayimtsü Delhi anasa Hindon Air base nung arua anenzük.

Arishi küm 76 tain Hasina'er sorkari ashishitep aketba quota system ka tenzükba sülen linük nung kaketshirtemi anir nübertemi lungkak aittsü tenzükba liasü.

Hasina-i Bangladesh Air Force tayimtsü ka nung India-i aru. Osang angazükba agi la London-i aotsü aser idakji political asylum meshitsü.

Osang angazükba agi Hasina lendong nungi jenbua alitsü tesemi kati anir ogo aser Hombarnü India toktsür maotsü.

Hasina-i mezüngbo London-i aotsü sentong liasü saka tebilemstü kar ajuruba ajanga lai bilemba ama meinyaktetsü akok ta osang angazük.

La India tonga aruba sülen National Security Advisor Ajit Doval den ajurutep. External Affairs Minister S Jaishankar-ia Prime Minister Narendra Modi den Bangladesh osang lemsatepogo. Ajisüaka PM Modi-

i Hasina den ajuruteptsü osangbo kecha mali.

Hombarnü lungkak aiter nisung meyrjang aikati linük yimtiba Dhaka nung adenshi aser parnoki Prime Minister ki nungpoka atu aser Hasina tebu Sheikh Mujibur Rahman indang kürakyanglu raksatsü. Sheikh Mujibur ya Bangladesh independence hero lir.

Hasina-i mapa toktsüba sülen Bangladesh Army chief General Waker-Uz-Zaman-i interim government kati linük ketdangtsü osang metetdaksüogo. Külen, kaketshirtemi mitkartemi yimsü asüba sorkar magizüktsü ta shia lir.

Army chief General Waker-isa tekaratiba nung President Mohammed Shahabuddin den ajurutepa teinyaksü sentong lemsateptsü ta shiogo.

Deobarnü lungkak aitertem aser police tsüngda raradang nisung 100 tema tepset aser 1,000 tema yirua liasü.

"Yashi asürtem aser züngsema hopta asem tashi sorkar anema lungkak aita arudang nisung 300 tema süogo. Iba ya Bangladesh civil movement nung nisung teimtiba asüba mapang ka lir" ta Bangladeshi osangkaket The Daily Star ajanga metetdaksü.

Bangladesh kaketshirtemi

aniba non-cooperation movement ajanga tesüiba hopta ishika Prime Minister Hasina'er sorkar atema tayongzükerba jenti agütsüogo.

Sheikh Hasina-i linük toktsür aoba sülen lungkak aitertem lar kidangi nungpoka atuba video tem social media sabang balala nung prokshir.

Lungkak aitertemi Dhaka nung PM ki Ganobhaban kishizüng soketa tur loar ki telungi aiba video tem nung angur.

Cabinet Committee on Security senden amen

Bangladesh tensa atema tanü nikongdang Cabinet Committee on Security senden ka menogo. Iba senden ya Prime Minister Narendra Modi official residence nung amen.

PM Modi-i anir Cabinet Committee on Security senden nung ketdangtsürtemi Bangladesh tensa indang osang lemsatep.

Iba senden nung Home Minister Amit Shah, Defence Minister Rajnath Singh, External Affairs Minister S Jaishankar, Finance Minister Nirmala Sitharaman aser National Security Advisor (NSA) Ajit Doval nung aden.

External Affairs Minister S Jaishankar-isa Lok Sabha nung Leader of Opposition Rahul Gandhi dena Bangladesh osang lemsatepogo.

Meghalaya aser Tripura nung international border akangshir

Shillong/Agartala, August 5, 2024 (Agencies): Meghalaya state sorkari Bangladesh den international border nung night curfew alitsü lemtetogo ta Deputy Chief Minister Prestone Tynsong-i ashi.

Bangladesh den kilometer 444 arrtsü nung aonung 6:00 ako nungi anepdang 6:00 ako tashi curfew alitsü ta pai ashi.

Border Security Force (BSF) personnel aser Meghalaya Police den rongdak senden ka amendang iba lemtet agi. Bangladesh nung tensa kanga mejungi akümba ajanga night curfew alitsü lemtet

ta Tynsong-isa ashi.

Tanü Bangladesh Prime Minister Sheikh Hasina-i mapa nungi anenba sülen Border Security Force (BSF)-i kilometer 4,096 India-Bangladesh arrtsü ajaklen "high alert" sangdongogo.

Külen, BSF Director General (acting) Daljit Singh Chawdhary aser senior commanders Kolkata tongogo.

BSF-i "Operation Alert" tenzükogo aser field commanders dang "on ground" aser sepaai ajak arrtsü anüktsü mapa lemkütsütsü tetuyuba agütsüogo.

Bangladesh nung hopta ishika tejakdang tensa mejungi akümba sülen Bangladesh arrtsü anüktsü mapa lemküka aliba BSF sepaitem indang leaves sota yua lir aser tanü BSF unit ajak dang "acquire an all alert posture" tetuyuba agütsüogo ta BSF ketdangtsür kati ashi.

Tripura-ia Bangladesh den kilometer 856 agi arrtsütepa lir aser BSF-i security maparen akangshio.

BSF-i Tripura nung nübo talila mapa lemkütsüogo aser senior commanders-i maparen ketdangtsüa inyaker.

Mokokchung nung Independence Day atema mapa lemogo



78 buba Indian Independence Day anogomung atema Deputy Commissioner, Mokokchung indang Conference Hall nung August 5, 2024 nü mapalem aser shisadokden senden ka nung Deputy Commissioner Mokokchung, Thsuvisie Phoji-i jembiba noksa nung angur.

Dimapur, Luroi/August 05 (TYO): Aruya aliba 78 buba Indian Independence Day mera keta amungtsü nükjidong nung shisadokden aser mapa alemba senden ka Deputy Commissioner, Mokokchung indang Conference Hall nung August 5, 2024 nü mena liasü. Iba senden ya SDO (C) Shelly Kaitry lenisüba kübok agi, kong Deputy Commissioner Mokokchung, Thsuvisie Phoji aser Superintendent of Police, Mokokchung, Vesupra Kezo

dena liasü aser department balala nem iba anogomung atema mapa lema liasü. Iba anogomung nungtem nung institutional establishments balalai District Hospital, District Jail aser Orphanage semdangtsü. Iba anogomung sentong nung tongti tesemdangeri Independence Day speech agütsütsü, parade contingents temi march pass agitsü, sobaliba dak sendakba inyakyim balala alitsü, department balalai exhibition stalls lapoktsü,

Mokokchung Municipal Council (MMC) Councilors aser Govt. Officers tsüngta ar atsüteptsü aser iba sülen Mokokchung Football League 35+ aser DPDB XI tsüngta football exhibition match asayatsü. Deputy Commissioner Mokokchung ajanga HODs ajunga dang tongti tesemdang nem akum agüja Official state banquet nung adentsü metetdaksü. Iba senden nung district indang HODs ajunga dena liasü.

Tuensang nung Skill Proficiency Management training agi



Dimapur, Luroi/August 05 (TYO): Town Hall, Tuensang nung August 5, 2024 nü Skill Proficiency Management for Building aser danga kisü-jensü mapa inyaker Advanced Training of Trainers (TOT) phase tanabuba agiogo. Iba training sentong nung jembidang training ayongzüker Zynorique Initiative Society ajanga Tuensang nung lanurtem nem iba ama training

ayongzüksüba atema Deputy Commissioner Tuensang, Lithrongla Tongpi Rutsa-i pelaba lemsatepa liasü. Kanga kera melenshia ainba lima ka nung lenla ajak nung skilled jobs ya nungdaker aser skill development ajanga employment opportunities ya government aser private sector nung angutsü, ta lai ashi. Nagaland nung kisü-jensüba sector nung non-locals timba

inyaker, kechiaser lisopur Naga nung dak skill development maliba ajanga parnok ama meinyakteter, ta Tuensang DC ajanga ashi. Laisa iba ama skill training ajanga zünger mapa mangu aliba lanur aika electrician, plumber aser kisü-jensü mapa mela mela angutsü, ta ashi. Lai training agritem dang temulung agüja training nung adentsü ayongzüker aser state nung Department of Labour ajanga kisü-jensü nem scheme aser teyari balala agütsür, ta ashi. Tenempong Longchar, Team Zynorique ajanga training indang rateta ashi, kong EAC (P) Tuensang, Apuloka H Sumi menden liasü aser Netenba Ajem, Principal, ITI Tuensang ajanga melepzüng o jembia liasü.

Independence Day atema Chümoukedima nung senden amen



Chümoukedima nung Independence Day anogomung atema August 5, 2024 nü senden amendang tangokba noksa nung angur.

Dimapur, Luroi/August 05 (TYO): Tan ita Independence Day amungtsü aliba dak sendakba nung senden ka Deputy Commissioner, Chümoukedima indang Conference Hall nung August 5, 2024 nü senden ka mena liasü.

District nung Independence Day 2024 takok ngua mungtettsü mechi department balalai mapa inyaksü atema mapalemstü asoshi iba senden ya mena liasü. Iba senden nung Deputy Commissioner, Chümoukedima

ajanga ketdangsür aser staff ajunga dang amalitep akatsü ayongzüker aser pei mapa temulung agüja inyaksü ayongzüka liasü. Paisa ketdangsürtem dang pei nem nungloksüba mapa takok ngua inyaksü ayongzüker.

DC Tuensang ajanga travel advisory agütsür

Dimapur, Luroi/August 05 (TYO): Longkhim aser Mangaki tsüngta NH 202 indang Km 58.00 nung tzi agi National Highway 202 raksar yanglshitsü atema iba lenmang shibanga atatsü, ta Deputy Commissioner Tuensang, Lithrongla Tongpi Rutsa-i sangdong ka nung ashi. Tuensang nungi Kohima leni aortem dang Tuensang-Yangli-

Zunheboto-Kohima lenmang nung jajatsü ajungshir. Maneni Mokokchung leni aortem Tuensang-Yangli-Suruhoto Longsa mesüra Tuensang-Longleng-Changtongya-Mokokchung lenmang len senzüsü ajungshir, ta ashi. Tuensang-Longleng lenmang nung gari tulu mesenzüi atatsü metetdaksür ta sangdong ajangasa ashi.

Opang Jamir-i "Pungmang Naro" ken sayaogo



Dimapur, Luroi/August 05 (TYO): Opang Jamir-i pa indang official YouTube channel "OpangJamir" nung "Pungmang Naro (Dream Girl)," ken sayaogo, koba August 19 nungi tenzüka Spotify nunga stream sütetsü.

Iba "Pungmang Naro" ken nung Opang Jamir-i temeim samaba aser menungra bilemtetba indang ashir. Ken nung kanga jashiba aser sasaba aser tesendaktep nung mangatettep adoka temulung raksaba indang ashir.

Nagaland nung kanga jangja meteta aliba 'Avancer' band nung frontman ama tongti shilem agisang Opang Jamir-i jurila project tasen ka tenzüker.

Iba music video ya Vitz Zhimo ajanga yanglu aser Jongpongtemsu Longkumer-i zülu aser Opang Jamir aser Vitz Zhimo nati mejema liasü.

Dimapur nung mejangjaba tasü mang ka nguteta lir

Dimapur, Luroi/August 05 (TYO): Westyard colony nung lenmang anasa mejangjaba nisung tasü mang ka lir ta August 3, 2024 nü osang ka Sub-Urban Police Station dangi arua liasü, ta Dimapur Police sangdong ka ajanga ashi. Iba osang nung ajemdaker police station nung aliba duty party tem arsanga ao aser arishi küm 35-40 tsüngta tebur ka Westyard colony, Dimapur nung lenmang tezülen tasü longdaka liasü. Ozüng agi melaba maparen

ajak tembangba sülen tasü mang ya PM examination/jangjatsü atema District Hospital Dimapur Morgue nung bener oa lir. Iba nisungba ya sentsü tanen long pants, sentsü tanak aser temesung temtangpusa tula talang ka semer liasü. Iba nisungba aso süklep 5.3 shi lir. Kibur/kinunger/tembar temi Officer-in-Charge, Sub-Urban PS Dimapur den mobile number 7085055026 ajanga tongteprateptsü akok, ta sangdong ajangasa ashi.

Kohima nung DTCC quarterly senden amen

Dimapur, Luroi/August 05 (TYO): District Tobacco Control Cell (DTCC) indang District Level Coordination Committee (DLCC) quarterly senden ka August 5, 2024 nü Deputy Commissioner, Kohima indang Conference Hall nung mena liasü. Iba senden ya Deputy Commissioner, Kohima aser DLCC chairman, Kumar Rammikang, IAS lenisüba kübok mena liasü. Iba committee ajanga kaket reju temeket tasazük süklen 300 tsüngta moko agi yangluba oset nokdanga aliba akangshitsü jembia liasü. Parnoki mezüng aibelener dang senchi achitsü, iba sülen aibelener dang senchi achiba den külemi dokan tem shibangtsüsü lemteta liasü. Tanen makai aibelener dang senchi achiba den licence agientsü parnoki lemtet. Iba özüng mapa kuma amshitsü atema committee ajanga mapang shia dokan tem sema

jajatsü iba senden nung pangjema liasü. Senotsü peria meliaka DTCC Kohima ajanga Kohima kübok kaket reju balala nung Focus Group Discussions aser Information, Education, and Communication (IEC) maparen inyakba atema Kohima DC, Rammikang-i tenüngsang agütsü. Tang tobacco-free school aser home maparen tenzüka aliba den külemi ano pai tobacco-free wards, colonies aser villages atema maparen tenzüksü asüngdanga liasü. Iba senden nung District Nodal Officer of DTCC Kohima, Dr. I Simon Sumi ajanga Government High School New Market, Government High School Forest Colony, aser Government Middle School Naga Bazaar ya tobacco-free schools ta sangdonga liasü. Kasa senden nung Social Worker DTCC, Achila Walling ajanga DTCC Kohima ajanga maparen balala inyakba osang agüja liasü.



August 05, 2024 nü Maharashtra kübok Sangli district nung sepaitemi tzümetsüng lendong nungi nisungtem kümzüka anir aodang tangokba noksa nung angur.

Bangladesh PM India nung jenoka lir; arrtsülen BSF kümüküma lir

New Delhi, Luroi/August 05 (Agencies): Tang Bangladesh nung tensa kanga mejungi aliba mapang ka Border Security Force (BSF)-i India-Bangladesh tsüingda kilometer 4,096 arrtsü nung units ajak kümüküma alitsü metetdaktsiogo.

Bangladesh Ato kilonser, Sheikh Hasina-i la menden nungi anenba sülen Banglaedesh nungi jena arua India nung jenokogo. Sheikh Hasina Bangladesh Air Force indang C-130J military transport tayimtsü ja ajanga India tonga aru.

BSF Director General Daljit Singh Chawdhary aser tongti ketdangsertem Kolkata tonga aoba sülen arrtsülen security tashi itshitsü atema jembishinüa inyakdar.

BSF-i field commanders ajak dang sepaitem arrtsüleni tangsa yokang, ta tuyuogo.

Bangladesh nung longkak sashia aitba sülen Bangladesh den arrtsülen lemzüka aliba BSF sepaitem indang sodi ajak thinentüsügo aser units ajak dang kümüküma alitsü metetdaktür.

Delhi nung BSF otongdar kati, "Tang tashi nungbo Bangladesh nung tensa terabo süngjema lir. Sepaitem kümüküma lir aser International Border nung tensa mita dang reprangdar," ta ashi.

BSF sepaitem yagi Bangladesh den arrtsüa aliba India kübok state pongu nung arrtsü anüker. West Bengal nung Bangladesh den arrtsüji kilometer 2,217 lir, Tripura nung kilometer 856, Meghalaya nung kilometer 443, Assam nung kilometer 262 aser Mizoram

nung kilometer 318 Bangladesh den arrtsüa lir.

Ano külen Delhi Police-ia Delhi nung aliba Bangladesh High Commission nung security akangshiba den külemi Indira Gandhi International Airport nunga security akangshiogo.

New Delhi district Deputy Commissioner of Police, Devesh Kumar Mahla den tongti ketdangser kari Bangladesh high commission semdanga security asadangogo.

Hombarnü Bangladesh Ato kilonser Sheikh Hasina-i la menden nungi anen. Bangladesh nung nüburtemi tesüiba hopta aika sorkar anema longkak aita arudang nisung aika süogo. Tesüiba anogo ana tsüingda kija nunga nisung 106 süogo.

Osang angazükba agi, Hasina helicopter ka nung aruba sülen India tongogo.

Bangladesh nung sorkar mapa shilem 30 bo 1971 küm Bangladesh War of Independence atema raraba nung shilem agir sepaitem indang kinüngertem nem wazüka yutsüba anema kaketshirtem leniba nung nüburtemi sorkar anema longkak ait tenzüka liasü.

Hasina den teno Sheikh Rehana na linük nungi ajenba sülen mapang tatsüka tsüingda longkak aiteritem aika Ato kilonser kidangi tua odiodia auyaa liasü.

Arrshi küm 76, Hasina ya Bangladesh tentetsang, Sheikh Mujibur Rahman'er jala lir. 2009 küm nungi lai Bangladesh yimsü süa aruogo.

Hombar nikongdang la Uttar

Pradesh kübok Ghaziabad nung aliba Hindon Air Force base tonga aruba sülen lai India National Security Advisor (NSA), Ajit Doval ajuruogo.

External Affairs Minister S Jaishankar-i Ato kilonser Narendra Modi nem Bangladesh tensa osang metetdaktü aser Lok Sabha nung opposition lenir aser Congress MP, Rahul Gandhi-ia Parliament nung Jaishankar ajurua iba osang metetpelaogo.

Osang angazükba agi Sheikh Hasina London-i aotsü aser la yangji jenoka alitsü atema lai temelaba meshitsüa akok.

Bangladesh tensa nung ajemdaker Indian Railways-i Bangladesh-i aoba train service ajak anenogo aser Air India-ia Bangladesh yimtiba, Dhaka tashi aoba tayimtsü ana thinentüsügo.

Sorkari longkak aiteritem mazüokteti akümba sülen Bangladesh Army-i menden nungi anentsü atema Sheikh Hasina nem minute 45 agüja liasü. La menden nungi anenba sülen Bangladesh Army tongti, General Waker-Uz-Zaman-i, sepaitemi khenpiga atema sorkar tentetsü, ta shia nüburtem dang longkak aitba anentsü metetdaktü.

General Waker-Uz-Zaman-i "Tensa kanga majung. Ni Opposition lenirtem ajuruogo aser onoki iba linük yimsüsütsü atema khenpiga asoshi sorkar akümstü telemtetba agiogo. Nenok taküm aser kiojen kümzüktü, ta ni nangzüker aser khuret ajak agir. Nenoki taginüba ni ataloktsütsü, anungji rara ajak anenang," ta metetdaktü.

Kerala nung anentsüh lendong nung asürtem 380 dak tema jungogo

New Delhi, August 05 (Agencies): Kerala state kübok Wayanad district nung anentsüh lendong tulu atalokba sülen Hombar tashi nung anogo tenet jungogo; iba lendong nung nisung 380 shi asüba jangjaogo aser tang tashi nung tasü mang 220 bo ngutetogo.

Iba lendong atalokba sülen samaba nisung 180 bo tang tashi menguteter.

Anentsüh lendong agi kongshirtem jenokdaktütsü atema Wayanad district tesem balala nung camp 53 amenoka lir, aser item camp nung nisung 6,759 jenoka lir. Parnok rongnung tetsür 2,677, tebur 2,501, tanur 1,581 aser mashisa tetsür 20 lir.

July 30 anepdang züngia anentsüh lendong tulu ajanga Wayanad district kübok Chooralmala aser Mundakkai kanga mejungi kongshia liasü.

Kerala chief minister,

Pinarayi Vijayan tetuyuba nung ajemdaker Amongnü aonung district administration-i ketdangsüa anentsüh lendong nung asür mejangjaba tasü mangtem ali nung remtsüogo. Yimsü balala nungi lenirtem sarasademba sülen maitsü mejangjaba tasü mangtemji ali telung nung remtsüogo.

Iba lendong atalokba mapang nungi tenzüka National Disaster Response Force (NDRF) teams, state sepaitem, Indian Army aser defence sepaitemi amang-sangwa methitemi kümzüka maparen inyaka aruba sülen tang tashi tasü mang bushidar.

Kerala state sorkari Wayanad district kübok Mundakkai region nung anentsüh lendong nungi kümzükertem atema jila tasen ka tentetsütsü, ta metetdaktüogo.



Srinagar, August 05, 2024: Jammu & Kashmir nung Arrla 370 agienba sülen küm 5 ajungba anogomong nung Srinagar nung BJP züngsemtem benjungtepba noksa nung angur.

Arrla 370 agienba anogomong nung J&K lenirtem aika 'house arrest' asü

New Delhi, August 05 (Agencies): Centre sorkari Jammu & Kashmir nung Arrla 370 agienba sülen küm pongu ajungba anogomong (August 5) nung Kashmiri nunger lenirtem aika house arrest asü, ta lenirtemi metetdaktü.

Osangbener den jembidang PDP Tir aser taoba mapang Jammu & Kashmir Chief Minister, Mehbooba Mufti-i, "Ni house arrest asü aser parnoki PDP office shibangtsü," ta metetdaktü.

Laisa social media ajanga, "August 5, 2019 anogo ya J&K atema tanak anogo ka dang masü saka India nunger democracy atema-a tenüngmenük anogo ka, ta puti otsü asütsü," ta metetdaktü.

"Iba anogo nung semi autonomous state tashi agien aser onok nem agüja aliba maongka ajak auya. Iba mapang nungjagi tenzüka ozü state nem ola madokdaktür, aser ibaji ajanga linük nüburtemi state nung tesü nep lir aser tensa junga lir ta züngshir," ta lai metetdaktü.

National Conference lenir aser taoba mapang J&K Chief Minister, Omar Abdullah-i, BJP

lenirtem nembo benjungteptsü atema temelaba agütsür saka iba Arrla agienba anema nokdakertembo pei kidang shibanga yutsür, ta ashitsü.

Omar-i social media ajanga, "J&K atemabo ibaji democracy aser tebilemba sadema jembiba lir. Tanü BJP lenirtem karbo benjungteptsü atema melar, ajisüaka J&K anema inyakba anema nokdakertembo Kashmir valley tesem ajaklen pei kidang shibanga yutsür," ta metetdaktü.

National Conference otongdar, Tanvir Sadiq-ia social media ajanga, "Ni house arrest süogo, iba ya kahenyongi menü ngdakba ka liasü. Mapa kar atema ni kidang nungi ayazüka aotsü tebilemba liasü, ajisüaka ozü kima police-i ni nokdanga liasü. Iba ya khenyongi menü ngdak aser ozü ng alema lir," ta metetdaktü.

Paisa, "August 5 anogo ya temzüng alema aser ozü ng alema lir. August 5, 2019 nü BJP-i Jammu & Kashmir nüburtem ashioktü. Temzüng sendokba ajanga BJP-i temzüng tenü ng menü ktsü aser J&K den tesendaktep raksa," ta metetdaktü.



Ahmedabad University nung BA-BCom atema fee sen lakh 4.60 meshiba anema August 5, 2024 nü Ahmedabad nung National Students Union of India (NSUI) züngsemtemi longkak aitba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, AUGUST (LUROI) 06, 2024

Mapa balaka shiteta yutsüba

India ama alima tulu aser kin tila tulu zünger mezüంగా alidak government mapai aitsü atema loktiliba nung temaba jenjang nung alirtem o teküpbok jenjang nung alirtem na jenjang balala nung tokteptsü asoshi mezüంగా lateta yutsüba ajanga tashitemetet aser rongsen nung tangar memenepba kintem nungia government mapa angutsüsa maongka agiteteter. India nung balaka takar aser tashitemetet kin tulutemi kin tilartem kanga mezüంగాmeshir aser parnoki teküpbok nung alir kin tila purtemjibo kasasa memchir amai mezüంగాshir. Aji, oda India nung kin tila o tulu na ki ka nung külemi alitsü makok, külemi chiyongtsü makok aser tsüngrem külemdaka külemi külemtsü makok. Parnokji mekongshiteplar, untouchable. Akhidang, America aser Africa limatem nung temesüంగా nisung o tanak nisung na amato, tanak nisung aser teküpbok tia nung alirtemjibo alar jenjang nung dang liasü. Tia junga, India yimten nüchiso ngur linük temzüంగా ozüంగా yanglurtem rongnung teküpbok jenjang nung aliba kin nungi London Univeristy tashi nung züngtetba Dr.B.R.Ambedkar tekolak liasü. Iba jagi linük temzüంగా ozüంగా yanglu dang India nung teküpbok jenjang nung aliba kintem tia indang kanga süoki ia bilema yanglu. Item rongnungji, government mapa nung inyaksü janngartem rongnung mapai aitsü toktepdang, India nung tashi mashir aser takar sensaker kin asoshi tama shilem balaka shiteta yutsür külenang tashitemetet aser takar kibong nungi adokba rogotem toktepdaksü. Aji oda, tanü tashi India government mapa nung shimoktsüba mapang, mapa adok shia tamasa teküpbok jenjang nung alir kin Scheduled castes pur asoshi 15 %, Scheduled Tribe purtem asoshi 7.5 % aser Other Backward Classes (OBC) purtem asoshi 27 % shiteta yur külenang tashitemetet aser takar kintem asoshi 50.5 % dang anüంగా toktsür. Atangji, tanüంగా 50.5 % nungjia SC,ST aser OBC purtemjia tajungertembo adentsü. Ajisüaka, India yimten nüchiso ngur küm 75 sülena tang tashi teküpbok jenjang nung alir SC,ST aser OBC purtemi 'General Category' nung alir temetet aser takar kintem den kasasa metoktepteter. Aji oda, Dr.Ambedkar ama ka linük temzüంగా ozüంగా latetertem rongnung mezüంగాsem asübo tang tashi, ashiko, SC, ST aser OBC nungi UPSC ajanga agiba tatidang ama nung IAS, IPS aser IFS ama jenjang angur kata melila. Kasaji government mapa bushiba nung dang masü saka technical azüంగా maparen nunga teküpbok jenjang nung aliba kintem asoshi menden balala shiteta yutsür. Iba amajika masü nungbo kasa teküpbok jenjang nung alirtemsa asüyonga ST telok nung adener Naga nungertemibo medical aser engineering nungbo mezüంగాtetla. Aji oda, ashiko iba ama teküpbok jenjang nung alir kintem asoshi government mapa nunga shilem balaka shiteta meyutsüka asübo Naga nung rongnung tang tashia UPSC ajanga Civil servant akümer melilaa akok. Kasaji, ano Nagaland government mapa nung shimba nunga Naga kintem rongnungsa süaka kaketshiba jenjang nung tesüpur kintem kar repringteta parnok nem shilem balaka shiteta yutsür külenang anüంగా mapatem asoshi kin ajak kasasa maongka agia tokteper. Iba jagi teküpbok jenjang nung alirtem aika ajanzükogo. Ajisüaka, tang Supreme court nungi akhidang nungi jembia aruba sentong ka tenzüksü asoshi ken o ka shidanga lir. Iba sentongji mapa küma inyakra, joko teküpbok jenjang nung alir kin purtem rongnunga tashitemetet aser takartembo iba 'reservation' maongka agiba nungi agientsü. Item dangji 'Creamy Layer' ta ajar. Iba Creamy Layer nung züంగాoktsüba kuliji kibong kati küm ka nung aatetba sen ajak agi lakh 8 dak tali süra, iba kibong nungi adokba chirnurtemjibo 'Reservation' nung yutsüba maongkaji magitetsü. Atangji, center nung dang masü saka Nagaland nunga Backward ta ajaba kin purtem rongnunga 'Creamy Layer' kibongtemji 'reservation' shilemji magidaksü nung dang shitakba sensaker aser talangi kaketshisatsü bushia moutetba kibongtem nungi adokba chirnurtemi 'reservation' nung yutsüba maongkatemji agitetsü. Center government kübok 'Creamy Layer' sentong tenzüksüba yabo teküpbok kintem nungi adokba yimsüsür Chirag Paswan aser Mayawati nungertemibo anemer, ajisüaka Creamy Layer purtem 'Reservation' nung medendaksütsü jembibajia mapang tonger jembir asütsü.

OLEMSABANG

SORKAR SCHOOL TENÜంగా TAJUNG TANABEN MEYIPA BENER ARUTSÜLA

~ L. Kika Pongener


Taoba ita nung Kohima nung District Master Trainer atema State Level Training sentong ka lapoktsüdong, School Education & SCERT Advisor Dr. K. Yhome-i, School Education Department tenung tajung tanaben meyipa bener arutsü merangang, ta kanga tongtipang onuk ka jembiba, osang kakat nung asenok ajaki züంగాgo. Atangji, asen yimsusuri jembibaji nubur ajaki hau ta agizüktetsüba kanga tongtipang onuk ka jembigo ta bilemer. Akhidang Sorkar School nung azüంగా asen tsüraburtem/lennirtem aika, sorkar mapa nung Commissioner, Secretary, Director etc. tashi tonga inyaker Pension ngur aika anisungzüka lidagi, ano karbo arishia tembangogo. Ano parnok amaji onok tedi nung, teyi nung, onok züంగాtema aika Sorkar School nung azüంగాtem sorkar mapa nung menden temaba tashi nung tenzüker tanü Pension angur alir aika lir. Akhidang sorkar school nung züంగా intetertem sorkar mapa nung jenjang tajung nung tenzüka pension ngur, ano Sorkar nungsa Minister, MLA & MP tashi tenzüka inyakerem aika lir. Ano sorkar school nung nung azüంగాtem asen Naga nung Doctor tajung aika adoka sorkar mapa nung tenzüker Pension ngur lir.

Sürabangla, kodaser tanü putu nungbo Sorkar School nung azüంగాtem tajung madoker...??? Mesura, kechiba tanü putu nungbo Sorkar School Result majunger...??? Kechiba tsüraburtemi pei chirnurtem Sorkar School-i meyoknur...??? Sorkar School nung tesayurtemji repringdanga ora, teimba ka Post Graduate teacher, Graduate teacher aser Trained Teacher (Qualified) teimba lir. Tanü Sorkar School nung azüంగా Student-temji repringdanga, kar dak alaka teimba ka kidang kilir-menlirtem (Mini-Kanja) lir. Ashiko, ibajagi tesayurtemi temulong agüja nendak-nendaka mesayur asü...???...ta khen-khenbo bilemer. Mesura kechi küli agi Sorkar School Result ya majunger...??? ta aiben shisadanger. Ajak dak alaka, Sorkar School nung tesayurtem ajaki pei chirnurtem Sorkar School nung mezüంగాdaksü nija (Private) School-iang yoker...? Iba nungji teshisadangtsü kar lir...!!! Kechiba Sorkar School nung tesayurtemi pei chirnurtem Sorkar School nung mezüంగాdaksür...? Surabangla, nuburtem-ibo kodaser Sorkar School-i pei chirnurtem yoktsü tamang kaatetsü...? Kechiba Sorkar School kar dak alaka teimba ka küm shia Result terenlokba malir...? ta nuburtemi shisadanger....? Ashiko, iba nungji Sorkar Department aser tesayurtem kija tamakok masü, yimtsüంగాtem aser jilatem nung Council Members, G.B's aser School management Board/ Committee, parnoki shitak tenuk yoka merepringba, parnok tamakoka karbo alitsü akok. Kechiba sura Sorkar School ajunga ya Communitized sur sorkari Village Council/Colony Council/GB/School Management Board parnok nem Sorkar School acha-ayanga repringtsü tashi karbo agüja lir.

(Maneni asüంగా adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüంగా angateta agitsü mepishir

Christians United for Israel-i anti-semitism anema nokdaksü nangzük



Christians United for Israel summit nung Senator, Lindsey Graham-i jembidang tangokba noksa nung angur.

August 05, 2024: Christians United for Israel (CUFI) nung züngsem meyirjang aikati US tesem balala semdanga America nungertemi anti-semitism (Yihuda nunger sempaba) anema nokdaksü asoshi osang prokba den külemi parnok maneni Israel pusemstü, ta metetdaksü.

CUFI ya America nung Yihuda nunger pusemba organization tulutiba lir.

Hopta ka tejaklen CUFI züngsem aika adenshia congressional lenirtem, ketdangsertem, security officials, shisashirtem aser Khristan lenirtem ajurua jembitsü atema renemogo.

Alima nung Yihuda nunger sempaba kanga bulua akümba mapang nung parnok

antisemitism anema nokdaksü asoshi lenirtem den o lemteptsü telemetba agiogo.

Talisa yaküm October 7 nü Hamas teloki Israel amakba sülen nungi alima tesem balala nung Yihuda nunger sempaba kanga bulua akümer.

CUFI züngsemtemi US Congress dang Iran Sanctions Enforcement Act, Countering Hate Against Israel by Federal Contractors Act aser Antisemitism Awareness Act ozüngtem agizüksü atema takhangba agütsütsü bangjemogo. Züngsemtemisa Congress dang, "Israel ya democratic linük ka" ta nenshia metetdaksütsü.

Senators- Joni Ernst aser Lindsey Graham na den Israeli Ambassador Gilad Erdan, Lt.

Col. (IDF ret.) Jonathan Conricus, taoba mapang US Special Envoy for Abraham Accords, Rabbi Aryeh Lightstone, Second World War mapang Holocaust nungi jenbur Yihuda nungertem aser yaküm October 7 nü Hamas teloki amakdang jenburtem aikati 'Never again' tenangzükba agiogo.

CUFI tentetsang aser Chairman, Pastor John Hagee-i, "Islamic Republic aser parnok pusemba kiralongrartemi asalentong yangluba dang masü saka amaker. Antisemitism ya tangalen masü saka yangi (America) lir. Israel-i tayongzükbatem ajuruba dang masü saka parnok taküm alitsü atema temenen den rarar," ta metetdaksü.

Wara sülen Tsüngremi mapa kanga inyakdar: Pastor Craig Cooney



Pastor Craig Cooney

August 05, 2024: Coronavirus wara mapang nung Tenla kitem shibangba ajanga Khristantem aika tekülem sentong magiteti kanga timtema aruogo, ajisüaka iba wara mapang nung nisung aikati Tsüngrem O atema kanga tzüra liasü.

Ajisüaka Coronavirus wara süir küm ana-asem arudang Europe nung, talisa United Kingdom tesem aika nung

revival milak janrua nisung meyijang aikati Yisu Khrista agizükdar.

"Tesüiba ita trok tsüngda sayatenya kanga ataloka arudar," ta Northern Ireland nung aliba Hope Church nung pastor, Craig Cooney-i metetdaksü.

"2020 nungi 2023 küm tsüngda Tenla kitem nung nisung kanga ajema liasü.

Arogotem kanga timtemogo kechiyong Tenla kidangi arurtem kanga ajema liasü. Züngsem kanga ajema akümba dang masü saka tejangraba maliasü aser Arogo main. Ajisüaka taküm küm tetenzüklen nungi temelenshi tulu ka adokdar, aser ni ibaji rasa-a meshiteter," ta pastor Cooney-i ashi.

Instagram nung Cooney indang 'followers' 100,000 dak tema kümogo.

Hopta shia par Arogo Tenla kidangi nisung teimba-teimba dang arudar, ta pai metetdaksü.

Nisungtemi parnok kibongtem atema sarasademer aser taneptsü angur; Tenla kidang Tsüngremi mapa inyakba onoki ajangshir, ta paisa metetdaksü.

Ano Scotland nunga Tsüngrem mapa kanga inyakdar. Taküm June ita nung sayutsüngir Rev. Franklin Graham-i Glasgow semdanga "God Loves You Tour" agiba mapang nung iba sentong nungji nisung 7,500 aden aser aikati Khrista agizüka liasü.

Ano August 8 nungi August 11 tashi UK kübok Bedfordshire nung 2024 Tent

ANO GO ABEN TSÜNGREM DEN

Taochi kübok nüchi

"Parnoki ne o manga aser parnok tsüngdang ne sayatenya mapatem parnok mulung nung mait; saka parnok tekong meranga, tashi manga sayua ano tanaben talenba süngra taii.. .na tai toktetba Tsüngrem, taochi aser temeim agi talubosa aliba Tsüngrem aser nai parnok medoktsü" (Neh.9:17) .

Khristantem teimla makaba ozüng abensaa inyakba ajanga pa tabensa ta kuli asütsü merangba nungi taochi kübok nüchi angu aser tang Pai asenok nem taidok agütsür alir, anungji taküm nung tamakok angutsü aliba nungi nüchi, aser tsüka aliba nungi anitettsü nüchi, Tsüngrem bushitsü aser tatok angutsü nüchi, aser tanaben tenzükshitsü nüchi agütsü. Asükümji asenok yimya jakla ka lir, koba agi peisasa kümzüktsü meranger, temeshi akümer, aser amajok konang bushir, tamakok menanzüker mesüra tanaben merangtsü songtemer. Anogo shia Khristan tashi maitba pur nem Pai tatok agütsür aser tanaben tepela angur. Yisui kechiba mezüngdangi taidok agüjang ta ashi? iba kuli kaji Tsüngremi mezüngdangi asenok nem taidok agütsür.

Pai anogo shia taidok agütsüjen agütsüba ajanga dang asenok taküm alir.

MP nung Khristan school ka dang Hindu tsüngrem noksa ayutsü tuyu

Mumbai, August 05 (Agencies): Madhya Pradesh nung Hindu yimsü alia amanger nisung 50 shi Khristan school ka telungi aiba sülen school ketdangsertem dang Khristan temaitsütem agienang, ta takhangba agütsü.

BJP indang student body-Akhil Bharatiya Vidyarthi Parishad (ABVP) nungi züngsemtemi Madhya Pradesh

nung Jhabua diocese kübok Jaora nung aliba St. Peter Higher Secondary School telungi aiba sülen St Peter aser Mari na indang kürakyanglua agienba sülen Saraswati tsüngrem noksa yuang, ta takhangba agütsü.

Ita ka tejaklen-a Hindu nunger telok kati Mansuar district nung aliba St Thomas Higher Secondary School nung ketdangsertem dang kaketshirtemji Hindu nationalist group kati ayongzükba sentong nung dendakjang ta takhangba agüja liasü.

School principal-i ibaji memelungba agi Hindu nungertem jagi school kiji raksaja liasü.

July 22, 2024 nüa Hindu nunger 50 shi Madhya Pradesh state kübok Guna nung aliba Vandana Convent School telungi aiba sülen principal dang Hindu nungertem melung yirutsüba atema tatok meshiang, ta takhangba agüja liasü.

Tang Madhya Pradesh nung BJP sorkar lir. Iba state nung nütsüng shilem 0.3 dang Khristantem lir.

Osangbener den jembidang Jhabua diocese nung Bishop, Peter Rimal Kharadi-i, "Iba ya tebilemstü onük tuluka lir," ta ashi.

Paisa, "Tesüiba küm 25 shi tanurtem nem shisaliok agüja aruba Khristan school ka anema inyakba ya onoki sashia aitsür," ta metetdaksü.

Jhabua diocese nung otongdar, Rocky Shah-i, tang iba tatalokba ya tawa Madhya Pradesh nung aliba Khristan school balala nung atalokbatem den kanga mesükteper, ta ashi.

Revival agitsü ayongzüka lir.

Ano külen United States nunga California nung aliba Harvest Christian Fellowship nung Pastor, Greg Laurie-i Anaheim nung ayongzükba Harvest Crusade sentong nung nisung 50,000 shi aden aser nisung 3,500-i Khrista nem taküm bendanga agütsüba sülen tawa Orange County nung aliba Pirates Cove nung nisung 2,000 baptiogo.

Osangbener den jembidang Laurie-i, "Tsüngremi mapa inyakba ni ngudar. US nung tesusabuba revival tulutiba atalokbaji 1970s mapang California nung Jesus Movement liasü. Onoki Kibuba dang, taoba mapang ama ano revival adokdakjang ta sarasademer," ta metetdaksü.

US nung Tsüngrem bushitsü janrartem asoshi taküm November 7 nungi November 10 tashi Dallas, Texas nung Christian conference ka ayongzüka lir.

'International organization-Aglow-i Christian Conference ya ayongzüker. Iba Conference ya 'A New Day' omen nung ajemdaker agitsü.

AO OSHI ANGAZÜKDAK:
TANÜ ANGAZÜKTSÜBA OJANG



Talang

(adj) anasa masü, oji nung (far)

* Onok yimtak nungi pilar talang nung oa alir.

Talang

(adj) tatsü masü, matongdak (tall)

* Tanü asüng tanur aika tar talang akümer.

OLONG PAITEP # 6867

1		2		3		4		5
6	7							
			8					
9			10					
				11				
		12						13
	14							15
				16				
			17					
							18	
19								

TIPIEN

- 2. Teburtemi tejak nung awaba - (8)
- 6. T _ _ _ em - (3)
- 8. Tzüik ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 6866 TELANGZÜBA

TIPIEN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti,
- 12. Süir, 13. Jen, 14. Ola,
- 16. Talak, 17. Mazük.

LANGTSÜNGLEN :

- 1. Tenükjang, 2. Luden,
- 3. Kioktsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.

NAI-A YA METETTER MA



Company ka nung mapang talangtiba mapa inyaksangji Walter Orthmann liasü aser iba atema pai Guinness World Record nguogo. January 6, 2022 anogo tashi nung Walter-i company nung küm 84 ser anogo 9 inyak. Walter ya 1922 nung aso aser pa arishi küm 15 asüdang Santa Catarina, Brazil nung Industrias Renaux S.A. (tangbo ReneauxView) ta ser textile company ka nung inyaksü tenzük. Iba anogo ya January 17, 1938 liasü aser iba sülen küm 84 inyaka arudang company nung temelenshi aika pai ajangshia aruogo. Pa dang 'world's most loyal employee' ta-a ajar aser pa August 2, 2024 nü alima nungi pilaogo.

Sorkari mapa metenzük tashi KSU-i aayangertem mita reprangtsü



Guwahati, August 5, 2024
(Agencies): State sorkari Inner Line Permit (ILP) aser Meghalaya Residents Safety and Security Act (MRSSA) maparen metenzük tashi onoki aayangi arurtem mita reprangtsü ta Khasi Students Union (KSU)-i metetdaksüogo. KSU-isa Meghalaya Identification Registration (Safety & Security) of the Migrant Workers Act nung Inter-State Migrant Workmen

Rules 2011 benoktsü shidangogo. Iba clause ajanga aayangi arurtem parnok talidak nungi police verification asütsü dena lir aser contractors-i ozüng alem inyakba atema temerenshi tuluba lir. Meghalaya state cabinet-i KSU dang Assembly nung item onüktem benoktsü aser tarutsü nung aibelenertem dang Rs 1 lakh senchi den ita asem tepuokdak ayutsü ta nangzükogo.

State sorkari Meghalaya Identification, Registration (Safety and Security) of Migrant Workers Act 2020 yanglushitsü lemtetba pusema nungiter ta Federation of Khasi Jaintia Garo People (FKJGP)-i metetdaksüogo. "State sorkari iba lemtet agiba pelashishia agizüker aser iba ajanga bendangertem aruba azüoktsü aser ken o benoka alirtem state-i aruba noktangtsü" ta FKJGP president Dundee Khongsit-i ashi.

2026 state Assembly elections tashi Assam opposition longjemtsü

Guwahati, August 5, 2024
(Agencies): Assam nung 2026 state assembly elections tashi opposition longjema alitsü osang metetdaksüogo. Mezüngbo United Opposition Forum Assam (UOFA) ya party 16 lokteper tentet saka tang party 18 kümogo. Deobarnü senden ka amendang UOFA-i taruba küm ana tashi election shia nung külemi yaritepa tokteptsü bangjemtep.

Party ajak külemi yariteptsü aser BJP tamakok ngudaktsütsü atema inyaksü mulungtepogo ta Congress spokesperson Bedabrat Bora-i ashi. Assam nung UOFA atema tongtipang tayongzükbaji taküm küm tatemlen panchayat elections asütsü. "Senden nung onok sasep mangatettep aliba angatetteptsü aser tajungba amalitepa inyaksangshitsü jembio" ta CPI(M) central committee member Isfaqur Rahman-ia ashi.

UOFA-isa state sorkari tzümetsüng aser ali anenziuka aoba khurettem Centre sorkar den timi melemsatepba atema aitsü. UOFA nung Congress, TMC, AAP, Rajgor Dal, AJP, CPI(M), CPI, AIFB, CPI(ML), Jatiya Dal-Asom, (U), Shiv Sena (UBT), NCP (Sharad Pawar), Samajwadi Party, Purbancholio Lok Parishad (PLP), RJD, APHLC, Kamatapur Front aser Sonowal Kachari Gana Mancha dena lir.

Centre sorkari Bangladesh atema 'Plan B' renemtsüla: Pradyot



Agartala, August 5, 2024
(Agencies): Bangladesh nung tensa tamajungba akümba atema Centre sorkari 'Plan B' yanglutsüla ta Tipra Motha lennir Pradyot Manikya Deb Barma-i ashi. Iba tensa ajanga Bangladesh den arrtsütepa aliba Assam, Meghalaya, Tripura aser West Bengal state tem nung kongshitsü ta pai ashi. "Bangladesh nung tensa ya kanga tamajung lir. Maldives nung ama Bangladesh nung India anema noktaker aika kümogo" ta Pradyot-i ashi. "Bangladesh nung kechi atalokdir iba ajanga Tripura, West Bengal, Meghalaya, Assam nung kongshitsü. Tang mesüra tarutsü nung langka kar

matalokdang India sorkari plan B renemtsüla" ta pai ashi. Linük atema defence tajungtibaji lisopur lir anungji Centre-i linük nung lisopurtem defence atema renemtsüla aser tashi agütsütsüla ta paisa ashi. "Asenoki Sheikh Hasina akhümtsübur aser sapur saka la sülen internal security atema tensa majungtsü" ta Pradyot-isa ashi.

Centre sorkari Bangladesh atema 'Plan B' renemtsüla: Pradyot

Ukraine-i F-16 fighter jets mezüngbuba agizükogo: Zelenskyy



Kyiv, Luroi/August 05 (Agencies): America nungeri yangluba F-16 fighter jets mezüngbuba Ukraine-i agizükogo, ta Tir Volodymyr Zelenskyy-i ashi.

“Ukraine nung F-16s lir. Asenoki inyaktetogo,” ta Tir Zelensky-i tenüng agüja maliba airbase ka nung ashi, aser pa sülen tayimtsü ana liasü.

Ukraine leniri par tembar linüktem dang pelaba lemsatepa liasü saka ano tali nüngdaker ta ashi.

Iba tayimtsü aruba ya Ukraine indang air force tashi ulushitsü atema tongtipang alizüng ka lir, shir Soviet mapang yangluba jets tem nung tuluba metaloka lir.

Ano F-16s tali angutsü imlar, ajisüaka item ajakji amshitsüasabo Ukraine nung pilots peria training agia mali ta Zelenskyy-i ashi.

Pai tayimtsü kwi Ukraine tonga aruar mashi mesüra item ajak ya Denmark, Netherlands aser US ajanga yokba asü

masüar mejangja, shirnok dang pai jangja-jangja pelaba shia liasü.

US Tir Joe Biden-i mulunga aliba European allies tem dang Ukraine dangi iba tayimtsü yoktsü August 2023 nung melaba sülen NATO linük temi F-16 ya 65 shi agütsütsü nangzüka lir.

F-16 ya 1978 nung mezüng yanglua liasü. Western military aikati iba tayimtsü ya US-i yangluba F-35 agi melentsü inyaktepba mapang lir, koba 2015 küm mezüng yanglua liasü.

UK indang air force nungbo F-16s ya mali, saka parnoki long-range Storm Shadow missiles agütsür, koba iba jets nung inokteter.

Ukraine indang F-16 ya anüolen linüki agütsüba Patriot aser Nasams ama surface-to-air missile systems den külemi inyakttsü, koba Ukraine nung lir.

F-16s yagi rockets, bombs aser missiles bener aotsü akoker, anungji air force yagi

occupied territory aser talisa Russia telung nung arütsü anasa tali maktettsü.

Iba tayimtsü yagi Russian glide bombs – pop-out wing kits nung inokba dumb munitions aser guidance modules amala nungi kumzüka yutettsü, koba United States-i tangluba JDAM munitions den mesükteper lir.

March ita kisüng nunga Russia-i iba bomb ya 3,000 shi tsükdaktsü, aser item ya timba Su-34 fighter-bombers nungi yoka liasü.

Ukraine-i ali nung F-16s ya kumzüka yutetra, ali nung glide bombs amshia memaktettsüsa Russian aircraft ya arizüka yokba nung tongtipang shilem agitsü.

Kyiv-i F-16s ya kar bendanger mitkar amenoka aliba tesem nung ayutsü akok ta ashi, saka iba yongji Tir Vladimir Putin-i Ukrainian jets yua aliba Western bases nung Russia-i amaktsü ta tekumdangtsü shia liasü.

Bangladesh PM Sheikh Hasina mapa nungi anener jena ogo

Dhaka, Luroi/August 05 (Agencies): Nisung takum jenti samaa hopta ishika nüburtemi longkak aitba sülen Bangladesh indang Ato Kilonser Sheikh Hasina mapa nungi anener linük nungi jena ogo.

Hopta ishika nüburtemi kanga sashia longkak aita arur Hombarnü ato kilonser menden nungi Hasina alu aser ano azüdokshitsü aliba nungi jenbur amai ajiteter.

Linük den jembidang army chief General Waker-Uz-Zaman-i interim government kati Bangladesh ketdang asütsü ta ashi aser nüburttem dang süngjemtsü ayongzük.

Hasina, shibai küm 20 jungnüa linük nung yimsü asü, la Hombarnü military helicopter ka nung mener ao ta ashir. Iba mapang lokti tulu kati national curfew mangai Dhaka nung lar ki telungi aitsü meranga liasü.

Hopta ishika longkak aitba mapang nisung 300 sür la mapa nungi anen. Deobar aonung azüdokshi nung nisung 100 jungnüa asüba sülen curfew benoka liasü.

Hombarnü yimti-yimtung nung sepaitem senzüa liasü. Ajisüaka longkak aiter tem tekong meranga nokdak aser



Dhaka-i aotsü ayongzüka liasü.

Iba sülen nisung telok tuluka ato kilonser aliba ki telungi ai aser Hasina-i o jembitsü aliba nokdanga liasü. Nikongdang ato kilonser jena aoba osang angashir yimtung nung benjongtepa liasü.

1971 küm Pakistan nungi nüchiso anguba sülen Bangladesh nung 1970s aser 80s nung mitkar temi aiben yimsü süa liasü, aser aikati ano mitkar yimsüsüba arutsü tsübor.

Army chief Waker-Uz-Zaman-i nüburttem dang army dak tamang akatsü ajungshi aser linük nung tesunep tanaben arutsü ta ashi.

“Longkak aitba mapang aser aser timtem ajurur alir ajak nem onoki ochi obendang agütsütsü,” ta pai ashi aser nüburttem dang aremzükteptsü aser azüdokshi aser ki o jen raksatsüba mapa

meinyaktsü ayongzüka liasü.

“Onoki political party tulu ajunga nungi teshimtet nisungtem jaoka lir aser parnoki iba tejaokba agizükogo aser onok den lungjemer inyakttsü mulungtepa lir,” ta general-i ashi.

Sorkar mapa nung quota scheme ka mechi Bangladesh nung ita ka jangdang nungi longkak ait tenzükä liasü. Sorkari university tem shibangtsü aser longkak aiter pua merenshitsü atema police aser mitkartem amshia liasü.

Hasina-i linük tesem ajunga nung curfew benok aser phone aser internet ajunga shibangtsü. Ajisüaka longkak aitba manen aser linük nung tematiba court-i iba quota ya shilem 30 aliba nungi shilem 5 dang kumtsütsüla ta ashi aser nüchiso asoshi raraba mapang asür kinunger atema yangji shilem asem agütsütsüla ta shia liasü.

Ajisüaka temelenshi meliasü aser nüburttem longkak aitba mazüokteti akum aser longkak aiter temi Hasina anentsü aser longkak aitba mapang tepseter nemo chi obendang agütsütsü akhang.

Hasina ya Hombarnü India nung Tripura yimtiba Agartala tongogo ta ashir.

MULUNGNEN O

“Kechiyong asenok taküm lira, asenok Kibuba atema taküm alir; aser asenok süra, asenok Kibuba atema asür. Anungji asenok süaka, mesüra taküm liaka, asenok Kibuba meyong.” Rom 14:8



Aso: 01/10/1946

Asü: 21/07/2024

MERENTOSHI LEMTUR (Rtd. H.A DPRO)

Onoki teti meima aliba Obala asür Merentoshi Lemtur (Asangma), mapang tatsüka shirangba anogo nungi tenzükter tasüba anogo tashi nung ana aser talang nungi kija, kibong, arogo, yimden aser temeimertem kwikati ozü asükho nung sarasadem, nübu, rongsen aser shisatsü agi yaritepogo, nenok ajak dang kanga pelaba lemsateper.

Talisa item lokti aser kija ya metetshi melitet nung nenok mapa tajung mulungnena pelaba lemsateper;

- 1) Doctors & Staff of Zion Hospital & Research Centre, Dimapur
- 2) Doctors & Staff of CIHSR, Dimapur
- 3) Doctors and Staff of Hayat Hospital, Guwahati
- 4) Mr. Arenba Jamir (Guwahati Ao Union President)
- 5) Shri. A.Pangjung Jamir MLA & Advisor Fisheries and Aquatic Resources
- 6) Mr. L. Yanger Lemtur (President Lemtur Kidong)
- 7) Ngati Baptist Arogo Mokokchung
- 8) Wokha Town Ao Baptist Arogo
- 9) Asangma Baptist Arogo
- 10) Artang Baptist Arogo
- 11) Meyilong Baptist Arogo
- 12) Medemyim Baptist Arogo
- 13) Asangma Senso Telongjem Mokokchung
- 14) Asangma Telongjem Fellowship Mokokchung
- 15) Asangma Senso Telongjem Dimapur
- 16) Asangma Senso Telongjem Kohima
- 17) Langpangkong Senso Telongjem Mokokchung
- 18) Langpangkong Zünga Telongjem Artang & Mongsenbai
- 19) Pensioner Association Mokokchung Unit
- 20) Management Dimapur Diesels (Tata Motors)
- 21) Dimapur Diesels Staff (Tata Motors)
- 22) Prayer Warriors
- 23) Mrs. Imkongsenla Lemtur & Ms. Chubasenla Lemtur Tulusang Tsüngremi nenok ajak molamoshia moajangta ozü sarasadem.

Temiem Kinungtsü, Chimur, Anükapang, Semchir aser Kinungertem.

MOKOKCHUNG YIM LONGKUMER KIDONG, KIFOTOSBA SEMCHIR TENÜNGSANG AGÜTSÜR

Wb. I.Toshi Longkumer aser Wt. Kilenkala Kichu na jabaso Sb. Nungsangmanen Longkumer, Auckland, New Zealand nung world Choir Games nung 'The Nagaland Matrigal Singers' telok tenüng nungi India lima meyonga shilem agiba den külemi par teloki Gold Medal ana tashi bener arutetba atema kidongi tenüngsang agütsür. Tarutsü nung Tsüngremi ne sempet tajung maneni moajangma.

Kidong tenüng nung;

1. Wb. I.Nungshiyanger Longkumer,
2. Wb. Talimeren Longkumer,
3. Wb. Lanukaba Longkumer.

Mali-i Ukraine den tesendaktep mayutsü telemtetba agi

Bamako, Luroi/August 5 (Agencies): July ita Russia Wagner pur iba rara nung tamajungtiba tamakok nunger Wagner group aser nguogo.

Mali sepaitem aika tepsetba nung Kyiv-i shilem agiba military intelligence agency osang angazükba sülen Mali-i (GUR) otongdar Andriy Yusov-i, public broadcaster Suspilne dang ashiba agi, atema telemtetba agiogo. Russia nunger ozüng alema inyaksangshiba iba telok anema jenjang agitsü asoshi

Tuareg telungpurtemi ashiba agi, parnoki taoba ita anogo asem tashi raraba Mali nunger telungpurtemi mapang mercenaries 84 aser parnoki nüngdakba osang Mali nunger sepai 47 ajak agizükogo. tepsetogo. Küm ana tsüngda

(Maneni tapak 8 nung...)

3buba National Javelin Day August 7 nü amungtsü



Dimapur, Luroi/August 5 (TYO): Tang mezüngbuba August 7 nü linük ajunga den külemi 3buba National Javelin Day amungtsü asoshi Chumoukedima, Dimapur, Kohima, Mokochung, Noklak, Peren, Shamator aser Wokha districts athletics den Nagaland Athletics Association longjemba pelashishia sangdonger, ta Nagaland Athletics Honorary secretary Mhonsao Ngullie-i sangdong ka ajanga metetdaksü.

National Javelin Day ya

Athletic Federation of India-i ayongzüka sentong ka lir, koba Neeraj Chopra-i Tokyo Olympics nung takok tajung nua India atema Athletic nung mezüngbuba gold medal ngutsüba nüngdem nung kümshia amunger.

Iba anogo tetoktepba ya U-12, U-14 & U-16 ta telok balala küma lemsar asayatsü. Telok ajak ya tetsür aser tebur ta shilem balala küma lemsar asayatsü. August 7 nü Nagaland kübok district 8 nung iba tetoktepba ya ayongzüka asayatsü.

Nagaland Athletics Association-i, Javelins, Kids Javelins amala equipments tem agütsüogo aser district 8 prongla nung category balala nung temaba jenjang nung tembangba asayar asemsem nem sempet agütsütsü atema renemtsüogo.

Iba dak sendakba nung Nagaland Athletics Association-i, temalen shisema aliba category küboki aiba tanurtem dang iba tetoktepba nung jangrabangra shilem agitsü asoshi kasa sangdong ajanga ayongzüko.

ICC Player of the Month atema Washington nominate süogo

Luroi/August 5, 2024 (Agencies): England nunger asayar Gus Atkinson aser Scotland nunger asayar Charlie Cassell na den India nunger asayar Washington Sundar-a July ita ICC Player of the Month Award atema nominate süogo.

Washington küm aika yiruba ajanga timtemba den züng-zünga masayateti aruba sülen tang international asaya nung pai pa jenjang yanglushiogo.

India team Zimbabwe nung oa T20 asaya pongu asayaba team nung Washington-a densema liasü. Asayar tejentem aika masayaba mapang arishi küm 24 tain asayar yagi bowling aser batting naprongla kanga junga asaya team nem teyari agütsü.

Mezüngbuba T20I asaya nung run 115 arishiba run 13 agi makokba asaya nung India nunger asayatem rongnungi Washington-ia kanga junga asaya. Pai run 11 agütsür wicket 2 agiba den run 27 yanglua team nem timla agütsü.

Iba sülen tanungba asaya nung pai ano wicket trok agi aser India-i iba asayamung 4-1 agi akokba nung teyari tulu agütsü liasü. Asayamung nung wicket ti agiba sülen pa nem Player of the Series naroküm agütsü aser tasembuba asaya nung pai run 15 agütsür wicket

3 agiba atema Player of the Match naroküm agütsü liasü.

Sri Lanka den asayamung nungbo asayar tejentem arua asayaba ajanga Washington asaya ka nung dang asayatet, saka pai iba asaya nunga Player of the Match naroküm nua liasü.

James Anderson atema tatembangbuba international asaya nung Atkinson mezüngbuba Test nung asaya aser pai kanga junga asaya wicket 12 agia liasü, kong innings shia nung pai wicket pongungu agia liasü. West Indies den asaya nung Mezüngbuba innings nung pai run 45 agütsür wicket 7 agia liasü aser tanabuba innings nunga pai run 61 agütsür wicket pongu agi.

Kasa mapang nung Cassell-ia Oman den mezüngbuba ODI asayaba mapang run 21 agütsür wicket 7 agia liasü aser ODI nung Kagiso Rabada-i mezüngbuba asayaba mapang run 16 agütsür wicket 6 agia küm teku tashi record ka bener aliba ajatetogo.

International jenjang nung mezüngbuba asayaba mapang Cassell-i mezüngbuba ball ana nung wicket ana agia asaya kanga junga tenzüka liasü. Pai over 18buba tashi nungbo wicket pongu agir liasü aser over tatemlen ano wicket ana agia liasü.

Dutch winger Simons RB Leipzig nungi maneni asayatsü

Luroi/August 5, 2024 (Agencies): RB Leipzig-i Netherlands nunger international winger Xavi Simons Paris St-Germain nungi tanabuba season atema loan nung anir aruogo. Pa 2024-25 season-a Leipzig nungi asayatsü atema tenangzüktepba yangluogo.

Arishi küm 21 tain asayar shiba taoba season iba Germany indang club nungi loan nung oa asaya liasü, pai asaya 43 nung goal 10 idaktsü aser assist 15 sütsü aser par team Bundesliga nung pezübuba nung tembangba nung teyari tulu agütsü liasü.

“Ni Leipzig-i aoba sülen ni aginüba ajak atalokogo. Ni team tajung ka nung denogo aser ajaki kü dak temulung alemer aser tamang akar ama bilemer,” ta Simons-i ashi.

“Ni asayar aser nisung ka ama kanga renlokogo aser



terenlok asoshi RB Leipzig ya tesem tajung ka lir.

“Iba den bendenloksema club-i ni kanga senti ama züngshir aser taoba ita ishika tsüngda parnoki ni alizüktü asoshi tejangraba aliba sayuogo. Taruba season asoshi parnoki ni atema sentong yanglur aliba jangja jangja sayuogo,” ta pai ashi.

Simons ya Euro 2024 nung Netherlands squad nung densema liasü aser England den semifinal asayaba mapang pai

mezüngbuba goal idaktsü, ajisüaka tia maka parnoki asaya goal 2-1 agi makok.

PSG-ia Hombarnü sangdong ka ajanga Simons loan nung yokba jangjashitsüogo, saka ashiba agi tenangzüktepba nung pa teti atema ayoktsü atemabo kecha shisema mali.

“RB Leipzig nungi Xavi taruba season kanga junga asayatsü imlaja atar,” ta club sangdong ka ajanga metetdaksü.

Taoba season Bundesliga nung kanga junga asayaba sülen pa Bayern densema Club tulutemia alizüknüa bilemba lemsatetepogo.

Simons ya 2019 küm PSG nung aden saka pa club nungi Ligue 1 nung asaya tenet nung dang asaya liasü. Pa PSV Eindhoven nungia küm ka asayaogo.

Sri Lanka den Test asayamung nung Crawley masayatetsü



Luroi/August 5, 2024 (Agencies): England team nung opener Zak Crawley teka tachichilen temeyong tilaba yiruba sülen Sri Lanka den Test asem asayatsü aliba nung masayatetsüsa kümogo.

England and Wales Cricket Board (ECB)-i iba asayamung atema Deobarnü England team

nung asayar 14 tenung sangdongogo.

Iba asayamung ya August 21 nü Old Trafford nung tenzütsü.

Arishi küm 26 tain Crawley ya taoba ita West Indies den tasembuba Test asayaba mapang yirua liasü.

Iba den bendenloksema seamer Dillon Pennington-a hamstring yiruba ajanga iba asayamung nung masayatetsüsa kümogo. Kasa mapang nung Jordan Cox tang mezüngbuba Test asaya atema team nung züngoksemogo. Arishi küm 23 tain middle-order batter ya 2022 küm Pakistan

nung oa asayaba mapang white-ball squad nungbo densema liasü.

Seamer Olly Stone-a, 2021 küm June ita sülen tang mezüngbuba Test squad nung züngoksemogo.

Sri Lanka den asayamung nung England team Ben Stokes lenisüba nung asayatsü.

England Test squad: Ben Stokes (captain), Gus Atkinson, Shoaib Bashir, Harry Brook, Jordan Cox, Ben Duckett, Dan Lawrence, Ollie Pope, Matthew Potts, Joe Root, Jamie Smith, Olly Stone, Chris Woakes and Mark Wood.

BENDANGLI OSANG : Tapak 7 nungi...

Mali-i Ukraine den tesendaktep...

Mali-i ashiba agi, iba olen ajanga parnok kanga aoksadaktsüogo aser Yusov-i iba tasümaier aser ashikelak inyakyim nung Ukraine densema aliba nangzüko.

Kiralongrartemi iba jenjang agiba sülen Malian Defence aser Security Forces züngsemtem aika süogo, ta shisem.

Sorkar otongdar Colonel Abdoulaye Maiga-i ashiba agi, Ukraine den tesendaktep tangsa tang raksatsü.

Maiga-isa, Ukraine inyakyim ya Mali sovereignty anema lir aser bendangertemi linük inyakyim nung jushiba aser international terrorism pusemba ka lir, ta ashi.

July 25 nü nungi tenzüka Algeria arrtsü anasa Tinzaouatene kübok military camp ka nung anogo asem tashi khatepa liasü.

Iba rara nung Mali nunger

sepaitem aika süogo ta army-i nangzüko, ajisüaka nisung kwi asü iba indang osang tejangja magütsü.

Iba hopta Russian Minister of Foreign Affairs Sergey Lavrov-i, phone ajanga mali indang Minister of Foreign Affairs Abdoulaye Diop dang pai Bamako maneni nongita yaritsü ta nenshia metetdaksüogo.

Mali nung military-i 2020 küm sorkar atsüng aser al-Qaeda o ISIL (ISIS) den sendaktepba aliba teloktem nungi linük meyipa agitsü tenangzüka agütsüogo.

Maneni parnok Russia den tesendaktepba tajungba küma yanglushiogo aser Wagner telok ya 2021 küm tatemlen nungi mali nung inyaksangshia arudar. Parnoki France nunger sepai aser international peacekeepers tem melena liasü.

BILEMDANGANG
 “Tanü na tangar asoshi tatishitsü tajung sayuba taküm ka süang.”